


# Qurbānī Īd



*qurbānī īd*

Why we Celebrate Qurbani Eid

(Urdu—Roman script)

© 2019 D. Denness

*published and printed by*

Good Word Communication Services Pvt. Ltd.  
New Delhi, INDIA

Bible text is from UGV.

illus.: R. Gunther

*for enquiries or to request more copies:*  
[askandanswer786@gmail.com](mailto:askandanswer786@gmail.com)



Ham Qurbānī Īd ke mauqe par kyā bāt yād karte haiñ?

Yih azīm id us qurbānī kī yād dilāti hai jo Allāh ne Hazrat Ibrāhīm se talab kī. Kaun-sī qurbānī? Apne beṭe kī qurbānī. Lekin is qurbānī kā kyā maqsad thā? Ham ise kyon manāte haiñ?

Tauret jis meñ is kā sabse qadīm zikr hai is maqsad par raushnī ḍālti hai.



Hazrat Ibrāhīm ām ādmī nahīn the. Wuh  
Ḳhalīlullāh yānī Ḳhudā ke dost kahlāte the. Lekin  
go Allāh ne un se beṭe kā wādā kiyā thā to bhī  
unheñ bahut-se sāl intazār karnā paṛā. Āḳhirkār  
jab wuh 100 sāl aur un kī bīwī 90 sāl kī thīñ yih  
mojizā huā ki un ke beṭā paidā huā.

Laṛkā baṛhā aur jawān ho gayā. Tab Allāh  
Hazrat Ibrāhīm ko āzmākar un se hamkalām huā,  
“Ai Ibrāhīm!”

Ibrāhīm ne jawāb diyā, “Jī, main hāzir hūñ.”



Ḳhudā ke agle alfāz se un ko saḳht sadmā pahuñchā. “Apne iklaute beṭe ko jise tū pyār kartā hai sāth lekar Moriyāh ke ilāqe meñ chalā jā. Wahāñ main tujhe ek pahār dikhāūngā. Us par apne beṭe ko qurbān kar de.”



Is saḡht hukm kā kyā maḡsad thā? Allāh to insān se muhabbat rakhtā hai. Usī ne insān ko banākar hukm diyā thā ki insān ko qurbānī ke taur par chaḡhānā saḡht manā hai. To Ḳhudā yahī kuchh kyon talab kar rahā thā?

Is qurbānī se Allāh Ta'ālā mustaqbil ke ek azīm wāḡiye kī taraf ishārā kartā hai. Is ke lie lāzim thā ki Hazrat Ibrāhīm Moriyāh ke pahār par jākar apne beṡe ko zabah karne ke lie taiyār ho.



Hazrat Ibrāhīm ke muñh se inkār kā ek lafz bhī na niklā balki wuh subh-sawere uṭhe, lakariyān kāṭīñ aur gadhe par zīn kasī. Apne jawān beṭe aur do naukaron ko sāth lekar wuh rawānā hue. Beṭā baṛī ḳhushī se ghar se niklā. Apne abbū ke sāth waqt kāṭnā kitnā achchhā lagtā thā. Use kyā mālūm ki Allāh ne use qurbān karne kā hukm diyā hai.

Safr karte karte tisre din qurbānī kī jagah dūr se nazar āī.



Unhoñ ne naukaron se kahā, “Yahān gadhe ke pās ṭahro. Maiñ laṛke ke sāth wahāñ jākar parastish karūngā. Phir ham tumhāre pās wāpas ā jāenge.” Us waqt bhī Hazrat Ibrāhīm kā imān thā ki donoñ hī wāpas āenge.

Bāp ne qurbānī ko jalāne ke lie lakaṛiyāñ beṭe ke kandhoñ par rakh dīñ aur ḳhud chhurī aur āg jalāne ke lie angāroñ kā bartan uṭhāyā. Donoñ chal die. Beṭā bolā, “Abbū!”

Ibrāhīm ne kahā, “Jī beṭā.”

“Abbū, āg aur lakaṛiyāñ to hamāre pās haiñ, lekin qurbānī ke lie bheṛ yā bakrī kahāñ hai?”






Qurbānī kā maqsad kyā hai? Is kā asl maqsad yih hai ki gunāhgār insān ko Allāh Ta'ālā kī qurbat muhaiyā kare.

Insān fitrī taur par Allāh se dūr hai. Kyon? Allāh muqaddas aur pāk hai jab ki insān gunāhgār hai. Us kī fitrat nāqis hai. Is lie wuh Ḳhudā ke huzūr nahīn ā saktā balki use ek ewazī kī zarūrat hai, ek qurbānī jo us ke badle chaḡhāī jāe.




Hazrat Ibrāhīm ne jawāb diyā, “Allāh ꙗhud qurbānī ke lie jānwar muhaiyā karegā, beṭā.”

Wuh āge baṛh gae. Chalte chalte wuh pahunch gae. Ab apne pyāre beṭe ko qurbān karnā thā. Lekin ab bhī beṭā tābedār rahā. Phir bāp ne use bāndhkar qurbāngāh par liṭā diyā. Unhoñ ne chhurī ko pakaṛ liyā tāki apne beṭe ko zabah karen.



Kuñbe kã lãḍlã apne bãp ke hãth marne ke lie taiyãr huã. Us ne ḡhãmoshĩ se maut kã sãmnã kiyã.

Magar ain usĩ waqt Rab ke farishte ne āsmãn par se use āwãz dĩ, “Ibrãhĩm, Ibrãhĩm! Apne beṭe par hãth na chalã, na us ke sãth kuchh kar. Ab main ne jãn liyã hai ki tũ Allãh kã ḡhauf rakhtã hai, kyonki tũ apne iklaute beṭe ko bhĩ mujhe dene ke lie taiyãr hai.”




Bāp aur beṭe donoṅ kī jān meṅ jān ā gaī. Phir bhī qurbānī pesh karne kī zarūrat thī. Achānak Hazrat Ibrāhīm ko ek menḍhā nazar āyā jis ke sīng gunjān jhāriyoṅ meṅ phaṅse hue the. Baṛī ḳhushī se apne beṭe ko āzād karke bāp ne jānwar ko apne beṭe kī jagah qurbānī ke taur par jalā diyā.

Bahte hue ḳhūn ko dekhkar laṛke ne sochā hogā ki yih merā hī hāl ho saktā thā! Shukr hai ki yih merī jagah qurbān huā hai.



Allāh ne Hazrat Ibrāhīm ko saḡht āzmāyā thā, aur wuh is mushkiltarīn imtahān meñ kāmyāb nikle the. Lekin is māmale ke pīchhe kyā maqsad thā? Hazrat Ibrāhīm ke agle alfāz qābil-e-ghaur haiñ. Chūnki wuh nabī the is lie unhoñ ne us jagah kā nām “Rab Muhaiyā Kartā Hai” rakhā. Bād meñ yih muhāwarā ban gayā aur log kahā karte the, “Rab ke pahār par muhainya kiyā jātā hai.”




Do hazār sāl ke bād Allāh Ta’ālā ne isī pahār yānī Yarūshalam ke pahār par ek kāmīl qurbānī muhaiyā kī. Us waqt Hazrat Īsā wahīn qurbān hue—bilkul usī tarah jis tarah Hazrat Yahyā un ke bāre meñ farmā chuke the, “Dekho, yih Allāh kā lelā hai jo duniyā kā gunāh uṭhā le jātā hai.”

Hazrat Īsā bhī apne bāre meñ farmā chuke the ki maiñ apnī jān insān ke gunāhoñ ko miṭāne ke lie qurbān karke use Ḳhudā ke qarīb lāūngā. Aur aisā hī huā. Unhoñ ne apnī jān dī aur peshgoī ke mutābiq tīsre dīn dubārā zindā hue. Allāh Ta’ālā ne un kī kāmīl qurbānī qabūl kar lī.



Buniyādī maslā yih hai ki insān pāk-sāf nahīn hai. Use jannat aur Allāh kī qurbat hāsīl nahīn ho saktī. Na sawāb aur na hī apnī jān kī qurbānī hamēn Ḳhudā kī qurbat dilā saktī hai. Is lie Allāh ne hamēn ek azīm aur anokhā wasīlā muhayyā kiyā. Us ne Hazrat Īsā ko bhej diyā tāki wuh kām kare jo ham se nahīn ho saktā. Un kā ḳhūn hamēn tamām gunāhoṅ se pāk-sāf kar detā hai. Wuh mar gae tāki hamēn Ḳhudā tak pahuñchāēn. Unhoṅ ne hamāre gunāh kī sazā bardāsht kī tāki hamēn māfī mile. Is kāmīl qurbānī se Allāh kī qurbat aur rasāī mumkin ho gāī hai.



Hazrat Ibrāhīm kī qurbānī hameñ yād dilātī hai ki

- Qurbānī kā maqsad gunāhoñ kī māfī aur Allāh kī qurbat hai.
- Jānwar kī qurbānī khud nāmukammal hai balki wuh kāmīl qurbānī kī taraf mahaz ishārā hai.
- Do hazār sāl ke bād Allāh Ta'ālā ne wuhī kāmīl qurbānī usī pahāṛ par muhaiyā kī. Us waqt Qurbānī Īd Hazrat Īsā kī jān kī qurbānī se takmīl tak pahuñchī.



Hazrat Īsā al-Masīh ne farmāyā,

Yih na samajho ki main Mūsawī shariyat aur nabiyon kī baton ko mansūkh karne āyā hūn. Mansūkh karne nahin balki un kī takmil karne āyā hūn. Main tum ko sach batātā hūn, jab tak āsmān-o-zamīn qāym raheᅅge tab tak shariyat bhī qāym rahegī—na us kā koī harf, na us kā koī zer yā zabar mansūkh hogā jab tak sab kuchh pūrā na ho jāe.

(Injil-e-muqaddas, Mattī 5:17-18)